

Saradnja između Kineza i “Elektroprivrede BiH” u projektu gradnje Bloka 7 Termoelektrane u Tuzli može dovesti do ozbiljnih problema po okoliš. Grupa inženjera iz Kine stigla je početkom augusta u BiH te su intenzivirane zajedničke aktivnosti koje zabrinjavaju ekološke i širu javnost.

Generalni direktor EPBiH pokušavao je ovih dana uvjeriti domaću javnost u opravdanost i isplativost cijelog projekta.

“Elektroprivreda” već duži vremenski period razvija naše razvojne projekte. Ovoj generaciji je pripala izgradnja Bloka 7. To je historijski najznačajniji proizvodni objekt. On je doprinos očuvanju okolišta. On kada bude izgrađen i pušten 2025. godine, biće najsavremeniji ovog tipa - poručio je prije nekoliko dana Anđelić.

A koliko će “doprinijeti” očuvanju okoliša, najbolje govori izvještaj Evropskog revizorskog suda, koji djeluje kao vanjski revizor Evropske unije. U izvještaju se navodi da je jedan od ciljeva Evropske unije postići nultu emisiju stakleničkih plinova do 2050. godine, a Bosna i Hercegovina, kao potencijalni kandidat za članstvo, ugrožava njegovo ostvarenje.

Posebno se problematizira kineski kredit za izgradnju Bloka 7 Termoelektrane (TE) Tuzla te direktno demantuju navodi čelnika “Elektroprivrede BiH”, pišu Vijesti.ba.

- Kineske kompanije ne pridržavaju se okolišnih standarda EU. “Evropski zeleni plan” jedan je od prioriteta Evropske komisije. Uprkos najavi s drugog foruma za saradnju “Jedan pojas, jedan put” iz 2019. o ostvarivanju “otvorene, zelene i čiste saradnje”, i dalje se nastavljaju realizirati energetske projekti u kojima je gorivo ugljen - navodi se u izvještaju.

Direktor Sekretarijata Energetske zajednice (EEZ) Janez Kopač upozorio je nedavno da će “Elektroprivreda BiH” zbog svega od sada uvijek imati mrlju na svojim bilansima, a posebno ukoliko BiH uđe u EU - tada će morati retroaktivno platiti svu nedozvoljenu državnu pomoć. To bi odmah, naglašava Kopač, bio bankrot “Elektroprivrede BiH”.

Ne treba zaboraviti ni teške političke posljedice koje nosi kineski utjecaj, a u tom kontekstu i upozorenja brojnih analitičara iz EU da se iza upornog insistiranja na kineskim investicijama kriju teški međunarodni kriminal i korupcija.

Izvor: slobodna-bosna.ba